

天津縣志卷之十六

名宦志

邑自雍正八年北割武清南分滄靜實兩漢以來  
幽冀漁陽渤海之地歷朝刺史太守而下實管領  
焉而名宦斷始自明者泛徵則慮其雜偏舉又失  
於簡也追溯風徽由明及今擇其循聲卓越者數  
人以著於篇夫所居民富所去見思生有榮號死  
見祭祀班氏序循吏傳所云若諸君子者庶幾無  
忝矣志名宦

明

天津縣志

卷之十六

名宦

一

于謙 字廷益錢塘人宣德四年以御史巡視長  
蘆鹽政捕馬船夾帶私鹽不避權貴悉置之法河  
道爲之一清

劉福 重慶人成化己丑以山東按察副使兵備  
天津營造衛城有能名

陳天祥 字元吉吳江縣人蒞天津道任未幾寇倡  
亂民多塗炭天祥備禦有方一鎮賴以全活

牛天麟 聊城縣人進士嘉靖二年任天津道廉能  
勤敏吏畏民懷興學校裁冗費期年而政蹟大成  
累陞大理寺卿

葛木 字仁夫上虞縣人進士以嘉靖九年蒞天津副使任河決朱家墳口險急難塞壞民田廬阻滯運道木載鐵鍋於船實土沉之始得鞏固至今無患

梁雲龍 字會可瓊山縣人進士陞井陘兵備副使尋以防倭之役改調天津兵備任時饑饉頻仍兵食俱困焦勞籌策俾得戰守用裕遠近安之他若舉鄉飲祀名賢課文訓武救荒賑貧一時美政不能殫舉陞湖廣副都御史

史鑑 字明古蘇州府人進士任天津道剖決如

天津縣志

卷之十六 名宦

二

流庭無滯訟親任案牘之勞而吏不能欺下無催科之擾而民安其業以不能諂事上官遂奪職去軍民千餘人涕泣號呼不捨

毛愷 字達和江山縣人進士所至咸著政聲及其蒞津也津屬五方雜處之地風俗不一民少淳朴利競魚鹽萬竈沿河而居日以戈矛弓矢爲事又中貴人皆所親屬遇有犯法輒齎金脫之以故益難綏輯愷至以大振公道爲先不信私書爲本三年習俗大變於是築堤修堰以備災平價現值以集貨嚴捕索以靖萑苻稽屯田以安什伍汰冗

弁以清煩擾明責任以雪冤誣於雜差則革之於  
妄費則裁之憫郵傳之勞則應付不苟恤疫癘之  
厄則埋掩維勤且自奉儉約布衣蔬食必以常祿  
歷陞吏部尚書加太子太保卒贈少保在津所著  
有津撫疏草督餉疏草餉撫疏草行世

賴庭檜 字爾舟晉江縣人進士萬曆七年任天津  
道增修學校振作人材易火甲爲房號併夫廠於  
驛遞民多便之陞四川叅政

郜 相 澤州人由舉人任天津兵備道仁明清慎  
修刻郡志垂憲永久歷陞貴州布政

天津縣志

卷之十六 名宦

三

查志隆 字鳴治海寧縣人萬曆十五年任天津道  
潞藩就封道經天津隆處置有方軍民不擾創建  
小學教民興行至今猶懷思之陞山東叅政

彭國光 字用卿德化州人進士萬曆間爲天津道  
廉潔明敏遇事有肩荷量裁驛遞整理海防尤稱  
有裨軍國

左光斗 桐城人萬曆丁未進士以御史出理京畿  
屯田上三因十四議詔悉允行水利大興北人始  
知藝稻改理學政執法衡文權貴不敢干以私涿  
州置水田數百頃贍貧生并給八府鄉試卷永爲

例又請開武學以教諸生射刻兼才錄與文並與人競超距

畢自巖 字景會山東淄川人進士天啓元年復設天津巡撫以僉都御史首任庶事草創晝夜經營招募水陸兵二萬人市馬千匹戰艦營房甲仗稱是請於部者不過七萬有奇以三萬成軍計所贏且四萬餘籌畫軍資事贍而用約他人莫能及也孫承宗以閣部督師閱邊至津見將士精銳部伍整肅歎曰使九邊盡若是何憂戎馬哉會山東妖賊起於鄒滕徵兵赴勦自巖以天津道來斯行監軍叅將劉永昌率五千人往前軍已抵德州而武邑妖黨于弘志聚衆數千突起應之勢甚張自巖急檄後軍守備董世賢移兵趣戰俘斬四千餘鄒滕賊以援絕而敗擒賊首徐鴻儒者寔自巖所遣將來燕禧也事平晉戶部左侍郎陞督餉部院尋以李邦華代巡撫事及李內陞津撫事以自巖兼之一時操兵餉兩柄前未有也

張星 宣城人恩貢崇禎間任天津同知向來衛軍家有餘丁雖幼穉亦按九則派役其有身死名存按籍徵發者軍不能支率多逃遁星下車惻然

念之爲援保定衛例止合一丁輸徭仍以徭役攤歸軍畝積困頓甦孫承宗有記志之

殷尚質 指揮僉事掌衛事有青天之號歷陞遼東總兵殞於陣贈少保諡忠勇仍遣官諭祭傳另詳人物

國朝

周天命 武舉陞天津鎮標中軍副將管叅將事唐官屯勦賊陣亡有傳傳另詳人物

徐永順 遼東人順治六年爲天津道時議勦洗靜海諸邑永順力保天津無賊全活無算

余 縉 浙江諸暨人進士康熙九年以御史巡視

天津縣志

卷之十六 名宦

五

長蘆鹽課著有善政商民戴之有鹽坨廳碑記詳藝文志

薛柱斗 延安人拔貢生康熙九年任天津道廉以率屬寬以惠民津門爲兵民錯處奸宄雜沓之所

綏靖得宜境內帖服

高必大 湖廣襄陽籍廣寧人貢生康熙九年任天津清軍同知政清刑簡愛士惠民捐俸修學循聲

遠著

趙良棟 寧夏人康熙十二年任天津總兵整什伍勤簡練嚴以一號令誠以待士卒精熟陣法乘機

決策莫識其謀望重海內累官四川總督加兵部

尚書卒諡襄忠祀天津名宦雍正十一年奉

特旨入祀賢良祠

江 繫 字采伯湖廣漢陽人拔貢康熙二十八年任長蘆巡鹽御史次年新增天津鹽引四千道繫奏照康熙十七年臺臣傅廷俊條議酌留七百道餘俱裁革

張可立 長蘆鹽運司經歷清廉律已著有政聲從祀名宦

杜于藩 字碩夫江都人監生長蘆青州分司康熙五十八年由吳橋縣擢是時漕政叢脞帑日虧賦

天津縣志

卷之十六 名宦

六

日逋于藩至凡有裨於商竈者悉心擘畫困賴以甦兩署天津同知事吏畏民懷至今稱頌

按祀名宦祠者尚有直隸總督朱昌祚趙弘燮直隸巡撫格爾古德于成龍直隸守道邵嗣堯五人畿輔通志所載政蹟無專及天津者故不爲立傳